



UPUTSTVO
o procedurama za rješavanje po prigovorima i žalbama
podnesenim Centralnoj izbornoj komisiji BiH i izbornim komisijama osnovnih izbornih
jedinica

Sarajevo, maj 2026. godine

Na osnovu članova 2.9 stav (1) tačka 2. i 6.3 stav (3) Izbornog zakona Bosne i Hercegovine (“Službeni glasnik BiH”, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24), Centralna izborna komisija Bosne i Hercegovine je na 29. sjednici, održanoj 06.05. 2026. godine, donijela

UPUTSTVO
o procedurama za rješavanje po prigovorima i žalbama
podnesenim Centralnoj izbornoj komisiji BiH i izbornim komisijama osnovnih izbornih
jedinica

POGLAVLJE I. UVODNE NAPOMENE

Član 1.
(Primjena – član 6.3 stavovi (1) i (3) Izbornog zakona BiH)

Uputstvom o procedurama za rješavanje po prigovorima i žalbama podnesenim Centralnoj izbornoj komisiji BiH i izbornim komisijama osnovnih izbornih jedinica (u daljem tekstu: Uputstvo):

- a) reguliraju se procedure za rješavanje po prigovorima podnesenim Centralnoj izbornoj komisiji BiH i izbornim komisijama osnovnih izbornih jedinica (član 6.3 stav (3) Izbornog zakona BiH),
- b) propisuje se sadržaj obrasca za prigovore (član 6.3 stav (1) Izbornog zakona BiH) i
- c) reguliraju se druga pitanja značajna za zaštitu izbornog prava.

Član 2.
(Supsidijarna primjena)

O svim pitanjima koja nisu propisana ovim Uputstvom, a odnose se na zaštitu izbornog prava, postupa se prema odredbama Izbornog zakona Bosne i Hercegovine i Zakona o upravnom postupku.

Član 3.
(Komuniciranje i računanje rokova)

(1) U izbornom periodu komuniciranje između Centralne izborne komisije BiH, izbornih komisija osnovnih izbornih jedinica i strana u postupku, koje se vodi po odredbama ovog Uputstva, odvija se putem aplikacije za podnošenje prigovora, žalbi i zahtjeva za ponovno brojanje (u daljem tekstu: aplikacija “ePrigovori”) na internet-stranici Centralne izborne komisije BiH www.izbori.ba, elektronskom poštom, neposredno i putem telefaks-aparata (u daljem tekstu: telefaks).

(2) Pored načina komuniciranja iz stava (1) ovog člana, komuniciranje između Centralne izborne komisije BiH i strana u postupku odvija se:

- a) putem internet-stranice Centralne izborne komisije BiH www.izbori.ba i
- b) putem e-adrese kontakt@izbori.ba s biračima koji glasaju izvan Bosne i Hercegovine.

(3) Politički subjekt dužan je u obrascu iz člana 4. ovog Uputstva navesti e-adresu ili broj telefaksa koji su Centralnoj izbornoj komisiji BiH prijavljeni za službeno komuniciranje, koji moraju biti dostupni i iste u izbornom periodu ne mogu koristiti drugi politički subjekti.

(4) Odluke Centralne izborne komisije BiH dostavljaju se objavljivanjem na internet-stranici Centralne izborne komisije BiH www.izbori.ba, a dan objavljivanja smatra se danom urednog dostavljanja. Ovaj način dostavljanja ima prioritet u odnosu na druge načine.

(5) Ukoliko se dostavljanje obavlja putem e-adrese ili telefaksom, kao dokaz o izvršenom dostavljanju uzima se odzivnik e-adrese ili telefaksa na kome se nalazi e-adresa ili kontakt-broj telefaksa. Ukoliko se na odzivniku e-adrese ili telefaksa ne nalazi e-adresa ili kontakt-broj telefaksa, ili se nalazi broj koji Centralnoj izbornoj komisiji BiH nije prijavljen kao službeni, ili ukoliko se dostavljanje političkom subjektu ne može izvršiti jer e-adresa ili telefaks nisu u funkciji, po ponovljenom postupku dostavljanje će biti izvršeno objavom pismena na internet-stranici Centralne izborne komisije BiH. Isti način dostavljanja primjenjuje se i u slučaju dostavljanja putem e-adrese. Ako se dostavljanje vrši putem telefaksa, politički subjekt je odgovoran za ispravnost i funkcionalnost telefaks-uređaja, kao i za osiguranje svih uvjeta za njegov nesmetan rad (uključujući toner, papir i sl).

(6) Rokovi teku od momenta dostavljanja (e-adresom, objavom na internet-stranici Centralne izborne komisije BiH www.izbori.ba ili telefaksom) i traju u skladu s Izbornim zakonom BiH.

POGLAVLJE II. PRIGOVOR

Član 4.

(Forma i sadržaj obrasca prigovora – član 6.3 stav (1) Izbornog zakona BiH)

(1) Prigovor birača i političkog subjekta čije je pravo, ustanovljeno Izbornim zakonom BiH, povrijeđeno podnosi se na obrascu koji sadrži:

- a) mjesto, vrijeme, počinioca i kratak opis učinjene povrede;
- b) odredbe Izbornog zakona BiH za koje podnosilac prigovora smatra da su povrijeđene;
- c) dokaze koji potvrđuju navode prigovora;
- d) e-adresu ili broj telefaksa na koje će se dostaviti odluka po prigovoru i
- e) potpis podnosioca prigovora.

(2) Uz prigovor podnosilac dostavlja obrazac iz člana 5. ovog Uputstva, osim ako nije ranije dostavljen Centralnoj izbornoj komisiji BiH ili izbornoj komisiji osnovne izborne jedinice kojoj se prigovor podnosi.

(3) Ukoliko se prigovor podnosi putem aplikacije “ePrigovori”, isti sadrži sve podatke i priloge iz stavova (1) i (2) ovog člana.

Član 5.

(Forma i sadržaj obrasca deponiranih potpisa)

(1) Ovlašteno lice za podnošenje prigovora je predsjednik ili ovlašten predstavnik političke stranke ili koalicije ili liste nezavisnih kandidata ili lice koje oni ovlaste, čiji podaci se deponiraju kod Centralne izborne komisije BiH i/ili izborne komisije osnovne izborne jedinice.

(2) Potpis ovlaštenog predstavnika ili lica koje ovlasti predsjednik ili ovlašten predstavnik političke stranke ili koalicije ili liste nezavisnih kandidata mora se nalaziti na obrascu deponiranih potpisa ovlaštenih predstavnika političke stranke, koalicije i liste nezavisnih kandidata za podnošenje prigovora i žalbi, koji se predaje nadležnoj izbornoj komisiji. Obrazac ovlaštenog lica se podnosi u periodu od dana raspisivanja izbora do dana potvrđivanja rezultata izbora.

(3) Obrazac podnesen od ovlaštenog lica iz stava (2) ovog člana sadrži:

- a) naziv političke stranke/koalicije/liste nezavisnih kandidata,
- b) ime i prezime ovlaštenih predstavnika političke stranke/koalicije/liste

- nezavisnih kandidata,
 - c) općinu/grad za koju/i je predstavnik ovlašten,
 - d) jedinstveni matični broj ovlaštenog predstavnika,
 - e) potpis ovlaštenog predstavnika,
 - f) mjesto i datum izdavanja ovlaštenja i
 - g) potpis predsjednika/ovlaštenog predstavnika političke stranke/koalicije/liste nezavisnih kandidata.
- (4) Ukoliko predsjednik, ovlašteni predstavnik političke stranke/koalicije/liste nezavisnih kandidata ili lice koje oni ovlaste povuče prigovor kojeg je podnijelo ovlašteno lice iz stava (2) ovog člana, smatrat će se da prigovor nije ni podnesen.

Član 6. **(Nadležnost i postupak odlučivanja)**

- (1) Izborna komisija osnovne izborne jedinice u svojoj osnovnoj izornoj jedinici ima prvostepenu nadležnost za odlučivanje po prigovorima uložnim zbog povreda pravila ponašanja iz Poglavlja 7. Izbornog zakona BiH, osim u slučaju povrede iz članova 7.2a, 7.3 stav (1) tačke 3) i 7), 7.3 stav (2) i 7.4 stav (1) tačka 3) Izbornog zakona BiH, o čemu odlučuje Centralna izborna komisija BiH.
- (2) Centralna izborna komisija BiH, pored prvostepene nadležnosti za odlučivanje iz stava (1) ovog člana, u prvostepenom postupku odlučuje i po prigovorima uložnim zbog povreda pravila izbornog procesa, izbornih prava i povrede Poglavlja 16. Izbornog zakona BiH učinjene od političkog subjekta.
- (3) Kad Centralna izborna komisija BiH i izborna komisija osnovne izborne jedinice prime prigovor za čije postupanje nisu nadležne, a poznato je ko je nadležan za postupanje, dostavljaju prigovor bez odgađanja nadležnoj izornoj komisiji osnovne izborne jedinice ili Centralnoj izornoj komisiji BiH i o tome obavještavaju podnosioca prigovora.
- (4) Centralna izborna komisija BiH i izborna komisija osnovne izborne jedinice odbacit će nedopušten, neblagovremen i prigovor kojeg je podnijelo neovlašteno lice.
- (5) U slučaju da prigovor nije podnesen na obrascu propisanom u članu 4. ovog Uputstva, ili prigovor koji se podnosi putem aplikacije "ePrigovori" ne sadrži sve podatke propisane članom 4. ovog Uputstva, kao i prigovor koji je nerazumljiv, nepotpun, odnosno ne sadrži dovoljno dokaza kojima bi bili potkrijepljeni navodi istaknuti u prigovoru te nisu navedene odredbe Izbornog zakona BiH za koje podnosilac prigovora smatra da su povrijeđene, Centralna izborna komisija BiH i izborna komisija osnovne izborne jedinice odmah obavještavaju podnosioca prigovora da u roku od 24 sata od prijema obavještenja dopuni prigovor i tako otkloni nedostatak na koji mu je u obavještenju ukazano. U istom obavještenju podnosilac prigovora se upozorava na posljedice neotklanjanja nedostatka, kao i činjenicu da će se u tom slučaju smatrati da prigovor nije ni podnesen.
- (6) Ako prigovor ne odbace iz razloga iz stava (4) ovog člana, Centralna izborna komisija BiH i izborna komisija osnovne izborne jedinice pristupaju njegovom rješavanju.
- (7) Kad Centralna izborna komisija BiH ili izborna komisija osnovne izborne jedinice odlučuju po prigovoru koji je dostavljen telefaksom i kada ocijene da je to potrebno, mogu zatražiti od podnosioca prigovora da original prigovora dostavi neposredno ili poštom.
- (8) Centralna izborna komisija BiH i izborna komisija osnovne izborne jedinice mogu prigovor odbiti kao neosnovan ili ga usvojiti i izreći mjeru ili sankciju.

Član 7. **(Rokovi za postupanje po prigovoru)**

(1) Birač i politički subjekt čije je pravo Izbornim zakonom BiH povrijeđeno mogu Centralnoj izbornoj komisiji BiH ili nadležnoj izbornoj komisiji osnovne izborne jedinice uložiti prigovor najkasnije u roku od 72 sata od učinjene povrede.

(2) Centralna izborna komisija BiH i izborna komisija osnovne izborne jedinice dužne su razmotriti prigovor i donijeti odluku u roku od 48 sati nakon isteka roka od 24 sata za dostavljanje izjašnjenja strana navedenih u prigovoru. Centralna izborna komisija BiH ili izborna komisija osnovne izborne jedinice o svojoj odluci odmah obavještavaju podnosioca prigovora, kao i druge strane.

(3) Izuzetno, u posebno složenim slučajevima kada je za utvrđivanje činjenica i okolnosti od značaja za rješavanje stvari potrebno saslušati stranke i svjedoke te steći uvid i pročitati veći broj materijalnih dokaza, Centralna izborna komisija BiH provest će postupak u roku od tri, a ne duže od pet dana nakon isteka roka od 24 sata za dostavljanje izjašnjenja strana navedenih u prigovoru.

Član 8.

(Unošenje prigovora, žalbi i zahtjeva za ponovno brojanje)

Centralna izborna komisija BiH i izborna komisija osnovne izborne jedinice dužne su prigovore, žalbe i zahtjeve za ponovno brojanje glasačkih listića iz svoje nadležnosti, a koji su primljeni putem pošte, telefaksa, elektronske pošte ili neposredno, odmah po prijemu unijeti u aplikaciju "ePrigovori" prema Korisničkom uputstvu za aplikaciju "ePrigovori".

Član 9.

(Registar prigovora, žalbi i donesenih odluka)

(1) Svi prigovori i žalbe zaprimljeni od strane Centralne izborne komisije BiH i izbornih komisija osnovnih izbornih jedinica vode se u aplikaciji "ePrigovori" i čine Registar podnesenih prigovora, žalbi i donesenih odluka.

(2) Podaci iz Registra iz stava (1) ovog člana objavljuju se na internet-stranici Centralne izborne komisije BiH www.izbori.ba, vodeći računa o principima zaštite ličnih podataka, u skladu sa Zakonom o zaštiti ličnih podataka.

POGLAVLJE III. ŽALBA

Član 10.

(Sadržaj žalbe)

Žalba sadrži:

- a) puni naziv, odnosno kontakte (s naznakom broja telefaksa ili e-adrese) podnosioca žalbe;
- b) broj i naziv odluke koja se pobija žalbom;
- c) navode u kojem dijelu se odluka pobija;
- d) razloge žalbe i dokaze;
- e) potpis podnosioca žalbe.

Član 11.

(Postupak po žalbi – član 6.6 stav (2) Izbornog zakona BiH)

(1) Na odluke izbornih komisija osnovnih izbornih jedinica može se uložiti žalba Centralnoj izbornoj komisiji BiH u roku od 72 sata od prijema prvostepene odluke.

(2) Ako je žalba na odluku izborne komisije osnovne izborne jedinice dostavljena direktno Centralnoj izbornoj komisiji BiH, ona će žalbu odmah dostaviti izbornoj komisiji osnovne izborne jedinice radi ispitivanja je li žalba blagovremena i uložena od strane ovlaštenog lica. Žalba će biti odbačena ako su ispunjeni uvjeti iz člana 6.3 stavovi (4) i (5) Izbornog zakona BiH.

(3) Izborna komisija osnovne izborne jedinice koja je donijela prvostepenu odluku, ako ne odbaci žalbu u smislu stava (1) ovog člana, može žalbu uvažiti i preinačiti svoju odluku ili žalbu dostaviti Centralnoj izbornoj komisiji BiH sa svim spisima koji se odnose na predmet i s izjašnjenjem na žalbu u roku od 24 sata od prijema žalbe.

(4) Centralna izborna komisija BiH dužna je razmotriti žalbu i donijeti odluku u roku od 48 sati nakon isteka roka za dostavljanje izjašnjenja iz stava (3) ovog člana.

(5) Izuzetno, u posebno složenim slučajevima kada je za utvrđivanje činjenica i okolnosti od značaja za rješavanje stvari potrebno saslušati stranke i svjedoke te steći uvid i pročitati veći broj materijalnih dokaza, Centralna izborna komisija BiH provest će postupak u roku od tri, a ne duže od pet dana nakon isteka roka za dostavljanje izjašnjenja iz stava (3) ovog člana.

Član 12.

(Postupak po žalbi na odluku Centralne izborne komisije BiH)

(1) Apelacioni odjel Suda Bosne i Hercegovine nadležan je da rješava po žalbama na odluke Centralne izborne komisije BiH.

(2) Žalba na odluku Centralne izborne komisije BiH podnosi se, putem Centralne izborne komisije BiH, Apelacionom odjelu Suda Bosne i Hercegovine u roku od dva dana od dana prijema odluke Centralne izborne komisije BiH.

(3) Kada odlučuje o primjeni ovog zakona, Apelacioni odjel Suda Bosne i Hercegovine dužan je donijeti odluku po žalbi u roku od tri dana od dana prijema žalbe.

Član 13.

(Evidentiranje prigovora i žalbi)

(1) Centralna izborna komisija BiH i izborna komisija osnovne izborne jedinice vode evidenciju (protokol) prigovora i žalbi. Na svaki primljeni prigovor ili žalbu Centralna izborna komisija BiH i izborna komisija osnovne izborne jedinice dužne su staviti otisak prijemnog štambilja s oznakom vremena (datum i sat) prijema podneska.

(2) Ako ovlašteno lice u izbornoj komisiji osnovne izborne jedinice ne posjeduje štambilj iz stava (1) ovog člana, dužno je na prigovoru, odnosno žalbi upisati vrijeme, sat i način njegovog prijema i staviti svoj potpis.

Član 14.

(Odmjeravanje kazne – član 6.7 Izbornog zakona BiH)

Prilikom odmjerenja kazne, ali ne ograničavajući se, Centralna izborna komisija BiH i izborna komisija osnovne izborne jedinice iz okvira svojih nadležnosti cijenit će olakšavajuće i otežavajuće okolnosti, uzimajući u obzir već izrečene kazne.

Član 15.

(Stjecaj i razdvajanje postupka)

(1) U slučajevima kada jedan politički subjekt učini više istih ili sličnih povreda propisanih Poglavljem 7. Izbornog zakona BiH, Centralna izborna komisija BiH može odlučiti da o

počinjenim povredama vodi jedinstveni postupak i izrekne jedinstvenu kaznu.

(2) U slučaju kada navodi iz prigovora ili žalbe upućuju na više povreda Izbornog zakona BiH učinjenih od jednog političkog subjekta, Centralna izborna komisija BiH može odlučiti da vodi razdvojeni postupak o počinjenim povredama ili da vodi jedinstveni postupak.

Član 16.

(Upotreba izraza u muškom i ženskom rodu)

Riječi koje su radi preglednosti u ovom Uputstvu navedene u jednom rodu, bez diskriminacije se odnose i na muški i na ženski rod.

POGLAVLJE IV. ZAVRŠNE ODREDBE

Član 17.

(Sastavni dio Uputstva)

Sastavni dio ovog Uputstva su:

- a) Obrazac prigovora (PPIK) iz člana 4. ovog Uputstva i
- b) Obrazac deponiranih potpisa ovlaštenih predstavnika političkih stranaka/koalicija/listi nezavisnih kandidata za podnošenje prigovora i žalbi za izbore (DP) iz člana 5. ovog Uputstva.

Član 18.

(Prestanak primjene)


Danom stupanja na snagu ovog Uputstva prestaje važiti Uputstvo o procedurama za rješavanje po prigovorima i žalbama podnesenim izbornim komisijama ("Službeni glasnik BiH", br. 27/22 i 31/24).

Član 19.

(Stupanje na snagu i objavljivanje u službenim glasilima)

Ovo Uputstvo stupa na snagu danom donošenja i bit će objavljeno u "Službenom glasniku BiH", "Službenim novinama FBiH", "Službenom glasniku RS", "Službenom glasniku Brčko distrikta BiH" i na internet-stranici Centralne izborne komisije BiH www.izbori.ba.

Broj: 05-1-02-2-715-1/26
Sarajevo, 06.05.2026. godine



Predsjednik

Jovan Kalaba

Na osnovu članova 2.9 stav (1) tačka 16. i 6.3 stav (1) Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24), Centralna izborna komisija Bosne i Hercegovine utvrdila je

OBRAZAC
ZA PODNOŠENJE PRIGOVORA IZBORNIM KOMISIJAMA

1. Naziv: Centralna izborna komisija BiH/ izborna komisija	
2. Ime i prezime, odnosno naziv podnosioca prigovora te broj telefaksa i e-adresa koji su Centralnoj izbornoj komisiji BiH prijavljeni za službenu komunikaciju ¹	
3. Datum i sat podnošenja prigovora:	
4. Datum, sat i mjesto učinjene povrede:	
5. Ko je učinio povredu:	
6. Kratak opis učinjene povrede:	
7. Odredbe Izbornog zakona BiH za koje podnosilac prigovora smatra da su povrijeđene:	
8. Prilog – dokazi koji potvrđuju navode prigovora:	
9. Mjesto, datum, sat i čitak potpis podnosioca prigovora (birača, ovlaštenog predstavnika političkog subjekta)	10. Potpis ovlaštenog službenika za prijem prigovora i pečat:
M. P.	M. P.

¹ U skladu s članom 6.2 stav (1) Izbornog zakona BiH, birač i politički subjekt čije je pravo, ustanovljeno ovim zakonom, povrijeđeno mogu izbornoj komisiji uložiti prigovor najkasnije u roku od 72 sata od učinjene povrede, osim ako ovim zakonom nije drugačije propisano.

Napomena: U skladu s članom 6.3 stav (2) Izbornog zakona BiH, prigovor se dostavlja bez odgađanja svim stranama navedenim u prigovoru. Strane navedene u prigovoru mogu se u roku od 24 sata od prijema prigovora, u pisanoj formi, izjasniti o navodima prigovora. Nadležni organi mogu odrediti saslušanje strana.

U skladu s članom 6.3 stav (5) Izbornog zakona BiH, prigovor će biti odbačen i ako se ne može utvrditi ko je podnosilac prigovora. Podneseni prigovor, odnosno žalba u postupku zaštite izbornog prava ne odgađaju obavljanje izbornih radnji koje su propisane ovim zakonom.

Ako je prostor (rubrika) na obrascu nedovoljan, koristiti poseban papir kako bi podaci i navodi bili čitki i jasni.



Na osnovu člana 2.9 stav (1) tačka 17, a u vezi s članom 6.3 stav (1) Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 07/14, 31/16, 41/20, 38/22, 51/22, 67/22 i 24/24), Centralna izborna komisija Bosne i Hercegovine utvrdila je **OBRAZAC DEPONIRANIH POTPISA OVLAŠTENIH PREDSTAVNIKA**

POLITIČKE STRANKE, KOALICIJE I LISTE NEZAVISNIH KANDIDATA ZA PODNOŠENJE PRIGOVORA I ŽALBI ZA IZBORE¹

Politička stranka/koalicija/lista nezavisnih kandidata _____
dostavlja potpise ovlaštenih predstavnika stranke/koalicije/liste nezavisnih kandidata:

R/B	Prezime	Ime	Općina/Grad	Lice ovlašteno od predstavnika/ovlaštenog predstavnika političke stranke/koalicije/liste nezavisnih kandidata	JMB:	Potpis ²
1.						
2.						
3.						
4.						
5.						

Napomena: Obrazac se dostavlja nadležnoj izbornoj komisiji (član 6.3 stav (1) Izbornog zakona BiH).

Obrazac se dostavlja uz prigovor koji se podnosi Centralnoj izbornoj komisiji BiH ili izbornoj komisiji, ako nije ranije dostavljen izbornoj komisiji.

Pečat

Predsjednik/ovlašteni predstavnik
političke stranke/koalicije/liste nezavisnih kandidata

Mjesto i datum

Potpis